

NEWSLETTER

decembar 2023.



FONDACIJA
HASTOR

Potpisivanje ugovora s novim studentima stipendistima Fondacije Hastor

Fondacija Hastor svake godine pruža nove prilike vrijednim mladim ljudima i otvara vrata svoje velike porodice. Na osnovu pravila i kriterija, početkom tekuće akademske godine raspisan je konkurs za dodjelu stipendija za redovne studente koji su upisani prvi put u akademsku 2023/2024. godinu. Pravo na prijavu ostvarili su studenti akreditiranih visokoškolskih ustanova u Bosni i Hercegovini.

Kao i svaki put, i ove godine je za stipendiju Fondacije Hastor aplicirao veliki broj izuzetno kvalitetnih kandidata, pa je, samim tim, bilo veoma teško odabrati one koji će postati članovi naše velike porodice. Iz godine u godinu, zainteresiranost studenata se povećava, a broj prijavljenih kandidata najbolje svjedoči činjenici da je Fondacija Hastor zajednica koja okuplja kvalitetne mlade ljudi različitih interesovanja i različitih oblasti studiranja – od prirodnih i matematičkih, do humanističkih i društvenih nauka – skupljene oko zajedničkog cilja – takmičenja u dobru.

Na osnovu pravila i kriterija, Komisija za odabir stipendista odabrala je one koji su se najviše istakli akademskim postignućima, svojim volonterskim angažmanima i društvenim doprinosom te su uspjeli balansirati sve obaveze i zadržati izuzetan akademski uspjeh. Svakako, tokom angažmana u Fondaciji njihove volonterske aktivnosti dodatno će se razviti i proširiti, čemu se posebno radujemo.

Nakon završenog konkursa, održani su intervjuji i potpisani su ugovori s 23 novih studentica i studenata. Gđa. Lejla Đonlagić, direktorka Fondacije Hastor, nove članove upoznala je s vrijednostima i misijom same Fondacije, benefitima koje dobijaju kada postanu njenim dijelom te njihovim budućim volonterskim angažmanom kroz koji će imati priliku usavršiti svoje vještine, a u isto vrijeme i doprinijeti svojoj zajednici. Također, istaknuta je svrha, vrijednost i značaj volonterskog angažmana u Fondaciji koji je jedna od njenih najvažnijih komponenti.

Fondacija Hastor svojim resursima ne pomaže samo individue kao takve već i kompletну zajednicu bh. društva. Volonterske aktivnosti usmjerene su ka društvenom napretku. Više mlađih članova porodice podrazumijeva više volonterskih sati, a volonterski sati više pređenih koraka do napretka i uspjeha.

Dakle, jedan od naših imperativa je ideju dobra i takmičenja u dobru neprestano širiti i prožimati kada god smo to u mogućnosti. Znanje nikad ne gubi. Novim stipendisticama i stipendistima čestitamo i nadamo se da će svojim volonterskim angažmanom opravdati povjerenje i njegovati sve vrijednosti Fondacije Hastor. S nestrljenjem iščekujemo da vas upoznamo s našim novim stipendistima te ćete o njima imati priliku čitati u narednim izdanjima našeg Newslettera.

Pripremila: Amina Bašić



Indira Džanić



Studenti stipendisti Fondacije Hastor koji imaju status mentora imaju neizmjerno važan zadatak, ulogu i odgovornost, jer su svojim pozitivnim primjerima uzor i inspiracija mlađim stipendistima u Fondaciji ali i okruženju. Ovaj mjesec predstavljamo vam našu dvadesetdvogodišnju Indiru Džanić, koja dolazi iz Čoseta, malog naselja kod Brčkog. Indira je svoje srednjoškolsko obrazovanje stekla u Poljoprivrednoj i medicinskoj školi u Brčkom, a trenutno pohađa Medicinski fakultet Univerziteta u Tuzli. Stipendistica Fondacije Hastor je već trinaest godina, a trenutno volontira kao vođa tima mentora koordinatora.

Indira je prvi ugovor o stipendiranju potpisala u petom razredu osnovne škole. Iskustvo koje je stekla kao stipendista Fondacije Hastor nešto je što je prati kroz cijelo školovanje, ali i uveliko gradi njenu ličnost. Tokom svih ovih godina upoznala je mnogo ljudi koji se bave medicinom, ali i brojnim drugim oblastima, što smatra jednom od najvećih prednosti nekoga ko je stipendista Fondacije Hastor. Provela je nebrojeno mnogo sati izučavajući različite teme, što je i utjecalo na to da ona danas bude svestrana osoba sa širokim pogledima na svijet. Volontiranje tokom svih ovih godina bilo je raznovrsno. Konstruktivne diskusije, razgovori s vršnjacima, putovanja, različita predavanja te snalaženja u nepredvidivim situacijama pomogli su joj savladati vještine javnog govora, pripremu predavanja i održavanje različitih vrsta obuka.

Kroz volontiranje u lokalnoj zajednici osvijestila je svoje karakteristike poput humanosti i važnosti pomaganja drugima. Kako i sama kaže, često se pronađe u situacijama gdje ljudima oko sebe prenosi motive i ciljeve Fondacije. Kroz dijalog s Indirom shvatili smo da je to, između ostalog, jedan od glavnih ciljeva Fondacije Hastor – širenje dobrote i pomaganje drugima!

Indira trenutno volontira u Fondaciji kao vođa tima mentora koordinatora, čija je uloga pružiti podršku mentorima na terenu. Njihov cilj je optimizirati volonterski angažman studenata te ukazati na načine na koje sati volontiranja mogu biti maksimalno iskorišteni. Također, njen tim nadzire produktivnost volontiranja koje izvode studenti.

Kao najdraže trenutke u Fondaciji Indira izdvaja osmijehe na licima koje je s kolegama iz volonterskog tima uspjela izmamiti ljudima s kojima su dolazili u kontakt pri volontiranju. Osjećaj koji je prati kroz volonterske obaveze za nju je nezamjenjiv pokretački faktor ka unapređenju ličnosti, ali i okruženja u kojem živi.





Indira je od malih nogu gajila veliku ljubav prema svijetu nauke. Kao posebnu strast uvijek je isticala izučavanje procesa funkcioniranja ljudskog tijela kao savršenog mehanizma koji trebamo čuvati i njegovati na najbolji način. Humani spektar ovog posla jedan je od glavnih faktora koji ju je vezao za medicinsku struku.

Na pitanje kako je tekao proces odluke o upisu fakulteta, kazala je da nikada nije imala dilemu u vezi s tim jer je već u trećem razredu srednje škole, pri prvom kontaktu sa stručnim i kliničkim predmetima, odlučila da je medicina pravi izbor za nju i da je to njen životni poziv.

Ova hrabra i ambiciozna studentica smatra da je za svaki posao najvažnije pronaći nit koja će nas vezati za njega:

Smatram da medicinari, bilo doktori, tehničari, farmaceuti ili bilo koja druga skupina zdravstvenih radnika, moraju posjedovati dvije osobine: želju za učenjem i razumijevanjem ljudskog tijela i želju za pomaganjem. Kroz srednju školu, odnosno praksu, upravo sam te osobine i spoznala u sebi te nisam mogla pronaći nijedan bolji način da ih iskoristim nego da zaplovim vodama medicine.

Kako Indira kaže, medicina kao naučna oblast pruža priliku za konstantan rast, učenje i rad na sebi te mogućnost spoznavanja sebe kroz spoznavanje (ne)funkcioniranja ljudskog tijela, slušanja tijela te optimiziranja svog, ali i tuđeg života. Također, izučavanjem svih medicinskih polja dobijamo priliku za nadogradnju vlastite ličnosti i karaktera u

bezbroj životnih sfera. Svakodnevno izlaganje različitim izazovima i susretanje s brojnim poteškoćama uči nas istinskim vrijednostima života te koliko je važno iskoristiti svaku minutu i svaki dan života kao da su posljednji.

Pored fakultetskih obaveza i volontiranja, Indira svoje vrijeme ispunjava odlaskom u teretanu i istraživanju nutricionizma, kako bi poboljšala svoje zdravlje i stanje svog duha. Također, isti taj sadržaj dijeli na društvenoj mreži TikTok kako bi motivirala druge. Za kraj, šalje nam snažnu poruku:

Moja poruka svim stipendistima je da iskoriste sve što im život pruža i da sve dobre šanse i prilike prihvate objeručke. Kroz Fondaciju imamo priliku da se izgradimo u jake i sposobne ličnosti s visokim samopouzdanjem te da upoznamo ljude čija prijateljstva će obilježiti naš život. Naučimo uživati u životu, a to zaista možemo s Fondacijom Hastor!

Pripremila: Hana Kolasević





Amina Bašić

Rubrika aktivnih mladih svakog mjeseca posvećuje se vrijednim stipendistima koji nesebično učestvuju u svemu onom što doprinosi zajednici. To su oni koji se svakim svojim postupkom trude biti bolja djeca, bolji prijatelji, učenici, studenti, mentorji, jednom riječju – bolji ljudi. Biti dobar čovjek znači uraditi dobro kad god za to imamo priliku.

Dobročinstvo ne poznaje ograničenje, ni vremensko ni prostorno, a također se ne zaustavlja jedino na direktnom doprinosu ljudima. Ono može biti i indirektno, što se često ogleda i u načinu na koji volimo, poštujemo i predstavljamo svoju domovinu. Prema tome, ovog puta predstavljamo vam našu Aminu Bašić, osobu koja je ispunila sve gore navedene kriterije altruiste i filantropa.

Amina Bašić dolazi iz Hadžića, pored Sarajeva. Završila je Prvu bošnjačku gimnaziju, a trenutno pohađa treću godinu studija na Filozofskom fakultetu Univerziteta u Sarajevu – Odsjek za bosanski, hrvatski i srpski jezik i Odsjek za književnosti naroda Bosne i Hercegovine. Autorica je nekoliko stručnih tekstova iz oblasti filologije i lingvistike te političkih i pravnih nauka koji su objavljeni u printanim i elektronskim časopisima. Njen prvi naučnoistraživački rad iz oblasti diplomatije (NATO integracija) objavljen je u novembru 2022. godine. Isto tako, angažirana je na prevodenju i digitalizaciji zbirke starih rukopisa. Aktivno se bavi i diplomatijom, kao i liderskim, prezentacijskim i retoričkim vještinama te je završila nekoliko obuka iz ovih oblasti. Bila je

i moderatorica prezentacija brojnih projekata, a pored toga i predavačica, govornica te učesnica na raznim konferencijama.

Svoj volonterski angažman započela je u radu s učenicima, a u vezi s tim ističe kako je upravo taj rad s mlađim stipendistima bio neprocjenjivo iskustvo u profesionalnom smislu – odlična priprema za njeno buduće zanimanje: profesorski poziv. Shodno tome, naglašava bitnost zajednice kao vrlo važan faktor koji utječe na razvoj ličnosti svake osobe:

Stvoreni smo da funkcioniramo zajedno i u zajednici, jer kao individue vrlo teško ostvarujemo značajnije napretke u društvu.

Amina je u mjesecu oktobru ove godine boravila u Narodnoj Republici Kini, u provinciji Fujian, i bila predstavnica Bosne i Hercegovine na omladinskom kampu Northeast Asia Youth Camp on Sustainable Development 2023 Fujian. Kanita Hamzić i Amina Bašić bile su ujedno i jedine predstavnice iz Europe.





Cilj Kampa bio je upoznavanje s različitim privrednim potencijalima gradova Xiamena, Wuyishana i Fuzhoa, obilazak kompanija čiji su glavni okviri poslovanja zasnovani na principu održivog razvoja. Posjete su bile popraćene sastancima i predavanjima s tim u vezi. Uz diplomatske aktivnosti Amina je imala priliku upoznati se s bogatom kineskom kulturom, umjetnošću, historijom, književnošću te diplomatskim kontinuitetom navedenih gradova.

Premda se Amina pokazala kao prava prijateljica, mentorica i filantrop, ona svoje vještine pokazuje volontirajući kao lektorica u okviru Fondacije Hastor. Amina ne krije svoje zadovoljstvo što na čitaoce Newslettera Fondacije Hastor može prenijeti znanje koje stječe na Odsjeku za bosanski, hrvatski i srpski jezik i na Odsjeku za književnosti naroda Bosne i Hercegovine:

Moram kazati da sam izuzetno ponosna što imam priliku i u praksi primjeniti sve ono što učimo na studiju i za šta se osposobljavamo. Lektorski posao veoma je zahtjevan, ali simultano osjećam ogromno zadovoljstvo što baš u tom spektru mogu doprinijeti radu Fondacije.

Na kraju, Amina poručuje mlađima i svim ostalim koji u jednom momentu svog života budu ovo čitali da rade na sebi – iznova i iznova – da teže onom cjeloživotnom učenju, brane svoje stavove hrabro i jako te uvijek budu dostojanstveni. Borba se, nažalost, ne završava preko noći, sveprisutna je i neizbjegljiva, ali je i jedini put do istine i pravde.

Pripremila: Aldina Šaljić



Sanela Avdibegović

Iako su kalendarski uveliko zima i niske temperature, redakcijski tim Fondacije Hastor posebnošću ovomjesečnog Newslettera unijet će toplinu u srca čitatelja. Pored ostalih rubrika, dolazeći na sredinu našeg Newslettera, da bismo zaintrigirali vašu maštu, ali i probudili vaše emocije i motivaciju, donosimo priču još jedne naše alumnistice. Svi ste već uveliko upoznati s činjenicom da je Fondacija Hastor porodica i da se njeno djelovanje u stipendistima osjeti i godinama nakon završetka stipendiranja. Fondacija Hastor i njeni stipendisti najposebnijim i najčvršćim korijenima ostaju vezani kroz cijeli život, a ono što stipendisti nauče kroz godine volontiranja primjenjuju u struci, poslu i osnovnim životnim postulatima. Nakon što čujemo priče iz njihovog sadašnjega života, primjećujemo da ono što radimo u Fondaciji ima neprocjenjivu i neobjasnjavljivu vrijednost. Upravo to pruža nam još veći entuzijazam za dalji rad i napredak. Za kraj uspješne godine, donosimo vam priču Sanele Avdibegović. Sudbina zaista piše čudne priče. Baš takva je i njena.

Sanela je živjela u Foči, gdje je završila prvi i drugi razred osnovne škole. Ipak, nemili događaji prekinuli su mirno djetinjstvo i početak školovanja te zbog ratnih dešavanja biva prinuđena da se odseli iz svog rodnog grada. Početkom rata preselila se u Goražde, gdje živi i radi i danas.

Nakon završetka srednje škole upisala je Ekonomski fakultet u Sarajevu. Tvrdi da je uvijek imala vrstu povezanosti s brojevima, odnosno računanjem i ističe da je oduvijek uživala u sabiranju i oduzimanju. Trenutno obavlja posao referentice za administrativno-finansijske i računovodstvene poslove u Srednjoj tehničkoj školi „Hasib Hadžović“ u Goraždu.



Na početku svoje karijere imala je mnoštvo prilika okušati se u novim stvarima te dobiti različite uloge u istoj ustanovi u kojoj trenutno radi. Prvenstveno je počela s radom u sekretarijatu škole, a nakon toga postaje predsjednica Sindikalne organizacije, članica Kantonalnog odbora te privremeno obnaša funkciju direktorice u periodu od šest mjeseci. Takoder, imala je priliku biti na vrlo odgovornoj poziciji – poziciji direktorice Direkcije za ceste Bosansko-podrinjskog kantona Goražde.



Sanelu se s radošću sjeća vremena kada je bila stipendistica Fondacije Hastor. Za Fondaciju je saznala zahvaljujući svome prijatelju. Njen dolazak u porodicu Fondacije bio je davne 2006. godine, kada je postala jedna od prvih stipendistica. Danas je Sanelu veoma uspješna i ostvarena žena.

Svi naši alumnisti većinom izdvajaju jednu stvar koja im je posebno značajna iz perioda njihovog volontiranja u sklopu Fondacije Hastor, a to je činjenica da su izgradili posebna prijateljstva koja traju sve do danas.

Sanelu nije krila kako joj je Fondacija uveliko pomogla u radu na sebi, težnji ka ostvarenju ciljeva te osnaživanju njene ličnosti. Naime, Fondacija je bila prostor u kojem je Sanelu postala otvorenija i hrabrija. Prije nego što je počela volontirati u sklopu Fondacije, bila je povučena i nesigurna u sebe. Osobe s kojima je dolazila u kontakt kroz Fondaciju Hastor pomogle su joj da se suoči sa svojim strahovima.

Tokom rata Sanelu je, nažalost, ostala bez roditelja i sve što se kasnije dešavalo uveliko je utjecalo na nju. Povlačila se u sebe kako bi se zaštitala i tako stvorila svoj svijet u kojem je sigurna.

Svoje volontiranje u Fondaciji pretežno je provodila s djecom iako je jedan dio vremena dolazila i volontirala u sklopu administracije u kancelariji Fondacije Hastor. S radošću se sjeća mjesecnih sastanaka koje je imala sa srednjoškolcima iz Goražda. Njih izdvaja kao posebno iskustvo i kao nešto što bi preporučila da svi trenutni stipendisti iskuse. Za kraj, poželjela je i direktno se obratiti svima nama i poslati motivirajuću poruku:

Vjerujte u sebe! Iskoristite to što vam nudi Fondacija Hastor – jedinstvena je. Obično kada dobijete stipendiju od drugih organizacija, nemate obavezu volontiranja, ali upravo to volontiranje u sklopu Fondacije Hastor uči nas da budemo društveno odgovorni, empatični te kako sitnica koju učinimo da bismo nekome pomogli može promijeniti nečiji život.

Iznimno dirnuti ovom pričom ponovo smo se vratili na razmišljanja o onome što se želi postići kroz volontiranje i povezanost Fondacije s njenim stipendistima. Fondacija Hastor želi svojim radom podržati i osnažiti djecu i mlade, a kada dobijemo povratne informacije od naših bivših i sadašnjih stipendista, kao što je ova Sanelina, znamo da smo na dobrom putu ka ostvarenju svojih ciljeva.

Pripremila: Hana Hajrić



„Mentor je osoba koja u vama vidi više talenata i sposobnosti nego što ih vi sami u sebi vidite i pomaže vam da te talente počnete koristiti.“

Bob Proctor

Činjenica je da na formiranje naše ličnosti u najvećoj mjeri utječe porodica. Istina, porodična atmosfera prvo je s čime se upoznajemo, susrećemo i prva okolina u kojoj naša faza učenja počinje. Dok ne krenemo u vrtić i školu, roditelji i ostali članovi porodice jedine su osobe koje mogu utjecati na naše ponašanje, mišljenje, razmišljanje i učenje. Međutim, činjenica je da prilikom upoznavanja novih ljudi moć utjecaja na nas iz roditeljskih ruku, svjesno ili nesvjesno, prelazi u ruke drugih. Posebnu ulogu tu imaju mentori i učitelji.


Mentori Fondacije Hastor imaju važnu ulogu u životu mlađih stipendista: pored toga što su mentori, učitelji su, neko ko ih uči vještinama, ali i uzor na koji se ugledaju. Fondaciju Hastor krasiti mnogo stipendista koji su mentori učenicima stipendistima, a ovog mjeseca istaći ćemo našu stipendisticu Alminu Ibrahimović i njenu volontersku grupu.

Almina Ibrahimović dolazi iz Srebrenice. Studentica je Farmaceutskog fakulteta Univerziteta u Sarajevu, a dio je velike porodice Fondacije Hastor već četiri godine.

Fondacija Hastor u mom životu i školovanju napravila je veliku prekretnicu. Pored finansijske pomoći imala je veliku ulogu u stjecanju mog znanja. Kroz Fondaciju i volonterske aktivnosti otkrila sam dosta novih stvari, upoznala zaista mnogo divnih ljudi, a neki od njih svakako su i moje mentorice koje su me provele kroz srednjoškolsko obrazovanje.

Almina u Fondaciji volontira kao mentorica učenicama Srednjoškolskog Centra za slijepu i slabovidnu djecu Sarajevo. Naime, njena grupa sastoji se od tri vrijedne, marljive i za svaki tip saradnje otvorene učenice. Na sastancima obično obrađuju teme koje su najvećim dijelom namijenjene razvijanju svijesti te, prvenstveno, prilagođene njihovom uzrastu.

Almina i njena grupa ovog mjeseca imale su priliku obrađivati temu pod nazivom *Naučimo kako da učimo: metode i tehnike brzog i efikasnog usvajanja znanja*, u okviru koje su obradile prema istraživanjima najvažnije i najuspješnije tehnike učenja. Kako gradivo ne bi bilo monotono i naučeno napamet, Almina je učenicama ponudila rješenja za lahko i učinkovito usvajanje znanja, ali su i učenice jedna drugoj otkrivale načine na koje se neka od tehnika može primjenjivati u bilo kojoj sferi interesovanja.



Tokom volonterskih sati uspoređivale su različite tehnike učenja te izdvojile one koje su se, prema njihovom mišljenju, pokazale najefikasnijim. Jedna od najučinkovitijih tehnika jeste mentalna mapa, odnosno učenje pomoću slikanja, crtanja i bojenja. Sukladno tome, sve tri članice predstavile su tehniku koja se u njihovom slučaju prikazala najučinkovitijim – mapu uma. Nacrtale su i obojile slike koje su uočljive, što olakšava pamćenje i učenje. Jedna od učenica na osnovu brojeva prikazala je jednostavniji i efikasniji način rješavanja matematičkih zadataka, i to tako što se postepenim raščlanjivanjem složenijih brojeva lakše dolazi do rezultata. Ova je tehnika učinkovita i veoma interesantna jer spaja naizgled nespojivo – slikarstvo, boje i općenito umjetnost s matematikom. Može se, naravno, upotrijebiti i u okviru drugih sfera.

S obzirom na to da preostale dvije stipendistice nisu bile upoznate s tim kako ovu tehniku upotrijebiti u sferi matematike, bilo im je drago što su baš na volonterskim satima u Fondaciji Hastor dobile priliku naučiti to. Pored toga, znanje se može usvajati i uz omiljene melodije. Riječ je o pretvaranju nepoznatih i nerazumljivih riječi

u tekst koristeći cijele riječi ili njihovo prvo slovo. Taj tekst može se učiti uz omiljenu melodiju kako bi se zapamtio kao jedna cjelina. Sve tri stipendistice iz teksta koji im je Almina predložila sastavile su popis teško pamtljivih riječi i učile ih uz omiljene kompozicije, u ovom slučaju istakla se Beethovenova kompozicija *Za Elizu*. Ova tehnika korisna je za svakoga, a posebno za one koji se bave ili će se baviti muzikom. Dok uče nove note, mogu usvajati i nove riječi. To je još samo jedan od dokaza kako Fondacija Hastor povezuje lijepo i korisno.

Na samom kraju Almina je istakla koliko svakim novim volonterskim sastankom uviđa važnost svoje uloge mentora u životu mlađih ljudi. Uviđa i to koliko oni međusobno utječu jedni na druge i koliko uče i unapređuju se zajedno. Kako kaže, to ju motiviše da nastavi razvijati svoje vještine i prenosi ih na mlađe generacije, sretna što joj Fondacija Hastor pruža takvu priliku. Ovaj sastanak bio je samo jedan u nizu primjera kako stipendisti Fondacije Hastor zajedno rade na svom unapređenju još od malih nogu, učeći svoje znanje dijeliti s drugima, svjesni činjenice da jedino tako ono dobija svoj konačni i potpuni smisao.

Pripremila: Aldina Šaljić

Međunarodni dan volonterizma

Kažu da je ljepota u očima posmatrača. Kakvu li onda ljepotu uočavaju volonteri dok svakodnevno svojim djelovanjem doprinose razvoju svojih zajednica i pomažu onima kojima je to najpotrebnije.

Volonter nije samo osoba koja djeluje u sklopu neke humanitarne organizacije, volonter je i svaki pojedinac koji radi nešto u korist svoje zajednice. Okruženi smo volonterima, pa čak iako su oni nekada naizgled neprimjetni, rezultati njihova djelovanja i više su nego uočljivi u društvu. Uzimajući u obzir navedenu rečenicu, slobodno možemo istaći historijsku činjenicu da je generalna skupština UN-a 1985. godine 5. decembar proglašila Međunarodnim danom dobrovoljnog rada za ekonomski i društveni napredak, a u našoj javnosti ovaj datum poznat je kao Međunarodni dan volonterizma. Danas se pred ljudima nalaze brojne prilike i načini kako mogu volontirati – od raznih kampova, seminara pa sve do samostalnog angažiranja u lokalnoj zajednici. Fondacija Hastor je organizacija koja pruža mogućnost volontiranja i nastoji ukazati na njegovu važnost. Osnovna ideja i cilj Fondacije je pružiti šansu mladima da svojim uspješnim školovanjem i volonterskim radom učestvuju u razvijanju lokalnih zajednica i vlastitih resursa.

Volonterski rad je najreprezentativnija komponenta Fondacije Hastor, a stipendisti su kroz skoro 18 godina postojanja ostvarili više od 1.700.000 volonterskih sati kroz koje su usadivane i razvijane najljepše ljudske vrijednosti.

Stipendisti Fondacije već godinama imaju priliku da volontiraju na razne načine, među kojima se posebno izdvaja mentorski rad s učenicima stipendistima, volontiranje u okviru lokalnih zajednica, instruktivni rad s djecom kroz specijalizirane klubove kao i razvijanje vještina kroz različite timove. Na taj

način, kao stipendisti Fondacije Hastor, mlađi ljudi imaju priliku čvršće se vezati za svoje zajednice, ali i od malih nogu razvijati osjećaj za pomoći drugima.

Mnogi od nas nisu svjesni koliko prednosti sa sobom nosi volontiranje. Onaj osjećaj kada imamo priliku iskusiti korisnost pri ulaganju svog slobodnog vremena za ostvarivanje nekog određenog cilja je neprocjenjiv. Biti dio nečega takvog i raditi na sebi i svojim vještinama može znatno utjecati na svaku našu radnju u budućnosti. Svi stipendisti Fondacije Hastor imaju priliku da dožive taj osjećaj i da na volonterizam pogledaju iz malo drugačijeg ugla.

Volontiranje je idealna aktivnost kroz koju se stiče iskustvo koje, osim ličnog zadovoljstva, donosi i brojne benefite prilikom zapošljavanja. Pojedinac u ulozi volontera ima priliku otkriti jedan potpuno novi raznoliki svijet. Taj svijet prepun je posebnih, lijepih i neočekivanih događaja.

Možemo istaknuti da volonterski angažman zapravo podrazumijeva svjesno poklanjanje svog slobodnog vremena, vještina i resursa za dobrobit drugih ljudi i zajednice. Volonter može biti osoba bilo kojeg uzrasta u onom momentu kad se javi želja za volontiranjem. Svaki dan imamo priliku uraditi neko dobro djelo, no na nama je da li ćemo je propustiti ili prihvati – Fondacija Hastor već godinama iskorištava te prilike jer, kako kaže Jimmy Doolittle, **ništa nije tako snažno kao srce volontera.**

Pripremila: Aida Suljić



Šapat

U skrivenom haosu
 unutar sebe stavi
 tačku
 neka to bude
 završena misao fantazije
 pusti rajske ptice
 iz kaveza u svojoj glavi
 neispijenu šoljicu kafe
 zamijeni za topliju
 gledaj kroz prozor
 svoju zbrku
 u obliku zimske idile
 ne mršti se nedjeljom
 pleši uz pjesmu
 složenog ritma
 i pusti emocije
 van da se poigraju
 sa godišnjim dobom
 paralelnim sa
 (ne)mirom u tebi

Semina Sadiković



FONDACIJA
HASTOR



Kontaktirajte nas!

Bulevar Meše Selimovića 16,
 Sarajevo
 033 774 789
 033 774 823
fondacija@hastor.ba



Redakcija

Maida Sarić
 Almina Šabanović-Kokot
 Adelisa Begić
 Semina Sadiković
 Hana Kolasević
 Hana Hajrić
 Aldina Šaljić
 Amina Bašić
 Aida Suljić
 Nikolina Stanar



Grafički dizajn

Adnan Kevrić



Naslovница

Nejla Dedić